

## ■ LIA RUMANTSCHA

# «Wunderfitz und Redeblitz» er per emprender rumantsch

■ (cdm/rtr/fmr) L'organisaziun «Wunderfitz und Redeblitz» lantscha en col-lavuraziun cun la Lia Rumantscha ina purschida cuntinuanta rumantscha. Quai scriva la Lia Rumantscha en ina comunicaziun. «Wunderfitz und Redeblitz» è in'organisaziun che sustegna la promoziun linguistica tempriva dad uffants a partir da trais onns fin l'entrada en scolina. Quella duai sustegnair l'integraziun d'uffants cun ina biografia da migraziun u ch'han in'otra lingua d'origin en vischnancas rumantschas u bilinguas. A lunga vista na meglierschida quai betg mo las pussaivladads per ina buna furmaziun da quels uffants, mabain augmenta era duraivlamain l'egualitad da las schanzas sin il martgà da lavur.

La Lia Rumantscha ha ussa adattà las materialas tudestgas en tut ils tschintg idioms e cumplettà quellas.

### Da la lindorna enfin al circus

«Wunderfitz und Redeblitz» sa basa dapi onns sin las chistas d'emprender. Quellas èn sa cumprovadas e cuntregnan chanzuns, versins, giesus ed istorgias davart temas specifics. Ensem cun persunas d'instrucziun scoladas per questa purschida, empren dan ils uffants a moda ludica e cun tut ils senns la lingua. Per il mument stattan a disposiziun 10 chistas davart temas sco la

lindorna, il ballape, il bogn u il circus. Ils proxims mais duain suandar ulteriurs 20 champs tematics. Fin l'onn 2022 duain lura star a disposiziun var 30 chistas d'emprender en ils idioms rumantschs.

### Sustegn chantunal

Ils curs en las vischnancas rumantschas sustegna il chantun Grischun cun ina contribuiziun analoga a la contribuiziun per la promoziun tempriva en las vischnancas tudestgas. Ils geniturs pajan sulet-tamain in import tranter 3 e 5 francs per lecziun. Il program cumpiglia totalmain 32 emnas da curs. Quellas cuzzan da settember fin zercladur. Vischnancas interessadas d'entschaiver il settember 2021 pon s'annunziar online.

«Wunderfitz und Redeblitz» è vegnì lantschà il 2005 da *Sibylle Zwyszig*, persuna spezialisada per la promoziun linguistica tempriva e scolasta primara. L'onn 2015 ha la Fundaziun Pestalozzi undrà il project cun il Premi da promoziun per territoris muntagnards da la Svizra. Oz vegnan las chistas d'emprender tematicas utilisadas en nov chantuns da la Svizra tudestga, tranter auter er en 24 vischnancas grischunas.

Dapli infurmaziuns:  
[www.wunderfitzundredeblitz.ch](http://www.wunderfitzundredeblitz.ch)



**Wunderfitz und Redeblitz» è in'organisaziun che sustegna la promoziun linguistica tempriva dad uffants.**